

Das 119. Capitel.

Der Mensch ist vmb dreyerley Ur-
sachen willen erschaffen.

Mensch sol
an sich habē
vñ darthun
das Bild
seines
Schöpfers

Die erste ist / daß er an sich haben vnd darthun sol / das
Bild seines Schöpfers / das ist / daß er **G**ott erkens-
nen sol / vnd ihm beyde nach den zehen Geboten / welche
ihm in sein Herz von oben herab eingebildet vnd geschrieben
seyn / vnd auch nach andern Geboten ihme von Gott gegeben
gehorsam seyn / vnd also **G**ott preisen sol mit innerlichen vnd
eusserlichen Kräfte vnd Wercken / vnd ihme solchen Dienst /
als einen auffgelegten Gehorsam vnd Zoll für vñ d für leisten.

Die andere / daß die Menschen in ordentlichen Ehelichen
Leben das Menschliche Geschlecht erbarren vnd vermehren sol-
len. Denn **G**ott hat wollen haben eine grosse Gemeine von
Menschen / darvon er mit gebühlichem Lobe geehret vnd ges-
preiset würde.

Mensch sol
seyn der
Haußhalter
der Welt.

Die dritte / daß der Mensch seyn solte der Haußhalter der
Welt / vnd ein Herr der andern Creaturen (darvon auch oben)
vnd doch in seiner masse / vnd der Güter vnd Wolthaten **G**otts
reichlich brauchen solte vmb der ersten Ursache willen nem-
lich / daß **G**ott in allen geschaffenen dingen / als ein all-
mächtiger / weiser / gnädiger vnd gütiger

Gott erkant vnd gepreiset
würde.



Das